

ESTATUTOS DA ASOCIACIÓN DE NAIS E PAIS DE ALUMNOS E ALUMNAS

“MILLAPEQUES” DA E.E.I

“MILLADOIRO”

DE MILLADOIRO- AMES

CAPITULO I

DENOMINACIÓN, FINS, DOMICILIO, ÁMBITO:

Artigo 1º. Coa denominación “**Asociación de Nais e Pais de Alumnos MILLAPEQUES**” da E.E.I. “Milladoiro” de milladoiro – Ames, constitúese esta Asociación, ó amparo da Lei Orgánica do Dereito á Educación 8/1985 e da Lei Orgánica 1/2002 do 22 de Marzo e complementarias e demais leis e disposicións complementarias, con capacidade xurídica e plena capacidade de obrar, carecendo de ánimo de lucro.

Artigo 2º. Esta Asociación constitúese por tempo indefinido.

Artigo 3º. Terá como fins os seguintes:

- a) Asistir as nais, pais e titores en todo o que se refire á educación dos seus fillos, fillas e tutelados.
- b) Colaborar nas actividades educativas e escolares do Centro.
- c) Promover a participación das nais e pais dos alumnos/as na xestión do Centro.
- d) Asistir ás nais e pais dos alumnos/as no exercicio do seu dereito a intervir no control e xestión do Centro.
- e) Facilita-la representación das nais e pais de alumnos no Consello Escolar do Centro.
- f) Estimular a participación das nais e pais do alumnado na programación xeral da ensinanza a través do órgano colexiado correspondente.

g) Fomenta-las relacións de cooperación do Centro con outros establecementos escolares e os sectores sociais e culturais do entorno.

h) Promove-la plena realización do principio de gratuidade no ámbito do Centro, así como a efectiva igualdade de dereitos de tódolos/as alumnos/as sen discriminación por razóns socioeconómicas, ideolóxicas, confesionais, raza ou sexo...

i) Requirir ós poderes públicos o cumprimento das leis, actuación e plans de actuación relativos á educación, acadando a atención e axudas que esta merece.

j) Promover actividades formativas, culturais e de estudio.

k) Promover reunións de colaboración de nais e pais co persoal docente e as boas relacións entrambos.

l) E todos aqueloutros non recollidos nos estatutos e que sexan conformes á lei.

Artigo 4º Para o cumprimento destes fins realizaranse, loxicamente, todas aquelas actividades formativas, culturais e de estudio e reunións con tódolos sectores da comunidade educativa e todas aqueloutras tendentes a cumprir-los fins sinalados e que sexan conformes á lei e decididas polos órganos competentes.

Artigo 5º. A). Para a realización das actividades que lle son propias, a Asociación utilizará os locais do Centro, a tal efecto o/a Director/a facilitará a integración de ditas actividades na vida escolar tendo en conta o normal desenvolvemento da mesma.

B). A efectos da utilización dos locais do Centro a que se refire o apartado anterior será necesaria a previa comunicación da Xunta Directiva da Asociación á Dirección do Centro.

Artigo 6º Para o mellor cumprimento dos fins esta Asociación integrouse na Federación Provincial de ANPAs de Centros Públicos de A Coruña e conxuntamente con outras ANPAS na Confederación Galega de ANPAS de Centros Públicos (CONFAPA-GALICIA) e a nivel estatal na Confederación Española de ANPAS (CEAPA).

Artigo 7º O ámbito da Asociación é local e fixa o seu domicilio na E.E.I Milladoiro sita na Travesía do Porto sen número, Milladoiro, Ames, A Coruña.

CAPÍTULO II

ÓRGANO DE REPRESENTACIÓN

Artigo 8º A Asociación estará representada e administrada por unha Xunta Directiva formada por:

- Presidente/a,
- Vicepresidente/a,
- Secretario/a,
- Administrador/a – Tesoureiro/a,
- Vocais mínimo un, máximo sete.

Tódolos cargos que compoñen a Xunta Directiva serán gratuítos. Estes serán designados e revocados pola Asemblea Xeral Ordinaria ou Extraordinaria e o seu mandato terá unha duración de dous anos, renovándose a partires do segundo ano, cada ano a metade dos membros.

Artigo 9º As persoas membros da Xunta Directiva que esgotaran o prazo para o que foron escollidos/as, continuarán ostentando os seus cargos ata o momento no que se produza a aceptación dos que os/as van substituir.

Artigo 10º A elección das persoas membros da Xunta Directiva pola correspondente asemblea, será polo procedemento de listas abertas.

Artigo 11º A Xunta Directiva elixirá de entre os seus membros os cargos correspondentes.

Artigo 12º As vacantes que se puideran producir por renuncia voluntaria comunicárase por escrito á Xunta Directiva, ou por incumprimento das obrigacións inherentes ó cargo, poderán cubrirse provisionalmente por membros que designe a Xunta Directiva ata que se celebre a primeira reunión da Asemblea Xeral.

Artigo 13º A Xunta Directiva reunirse tódolos meses do curso escolar e sempre que sexa convocada polo seu Presidente. Tamén deberá reunirse, a petición dun tercio da totalidade dos seus compoñentes. Quedará validamente constituída cando asista a metade máis un dos seus membros e, para que os seus acordos sexan válidos, deberán ser tomados pola maioría dos votos correspondentes ós presentes. No caso de empate, o voto do presidente será de calidade para deixar sen efecto o empate.

Artigo 14º As facultades da Xunta Directiva estenderanse, con carácter xeral, a tódolos actos propios das finalidades da Asociación, sempre que non requiran segundo estes Estatutos, autorización expresa da Asemblea Xeral.

Son facultades particulares da Xunta Directiva:

- a) Dirixi-las actividades da Asociación e leva-la xestión económica e administrativa, acordando realizar os oportunos actos e contratos.
- d) Executa-los acordos da Asemblea Xeral.

c) Formular e someter á aprobación da Asemblea Xeral os balances, contas e programa anual das actividades.

d) Resolver sobre a admisión de novas persoas asociadas se fose necesario

e) Nomear delegados/as para algunha determinada actividade da Asociación.

f) Calquera outra facultade que non sexa da exclusiva competencia da Asemblea e sexa conforme segundo a lei.

Artigo 15º A Presidencia terá as seguintes atribucións: Representar legalmente á Asociación ante toda clase de Organismos Públicos ou privados; Convocar, presidir e levanta-las sesións que celebre a Asemblea Xeral e a Xunta Directiva, así como dirixi-las deliberacións dunha e doutra; ordenar pagos e firmar xunto co Administrador/a-Tesoureiro/a os libramentos, cheques, etc.; recibir en nome da Asociación calquera cantidade provinte de subvencións de Entidades Públicas e/ou privadas; autorizar coa súa firma os documentos, actas e correspondencia da Asociación; adoptar calquera medida urxente que a boa marcha da Asociación aconsella, ou no que o desenvolvemento das súas actividades resulte necesaria ou adecuada, sen prexuízo de dar conta posteriormente á Xunta Directiva; asumirá tamén, en todo caso, tódalas facultades que a Lei establece.

Artigo 16º A Vicepresidencia terá a representación da Presidencia en ausencia deste/a, motivada por enfermidade ou calquera outra causa, e terá as mesmas atribucións que éste. A Presidencia poderá delegar neste as súas competencias para a atención ou xestión de asuntos determinados ou un conxunto dos mesmos, previa conformidade da Xunta Directiva.

Artigo 17º O/A Secretario/a terá ó seu cargo a dirección dos traballos administrativos da Asociación, expedirá certificacións, levará os Libros da Asociación legalmente establecidos e o arquivo de Asociados e custodiará a documentación da Entidade, facendo que se cursen as comunicacións sobre designación de Xuntas Directivas e demais acordos sociais nos correspondentes rexistros, así como a presentación das contas anuais e do programa de actividades e o cumprimento das obrigacións documentais, nos termos que legalmente correspondan; ademais velará pola conservación dos locais sociais e gardará o selo da Asociación.

Artigo 18º O/A Tesoureiro/a estará encargado/a de recadar e conserva-los fondos e bens da Asociación. Levará o Libro de Caixa e firmará os libramentos de fondos xunto co Presidente; elaborará o proxecto do presuposto que a Xunta Directiva debe presentar ante a Asemblea Xeral e preparará as contas que deban someterse a dita Asemblea.

Artigo 19º As persoas designadas como Vocais terán as obrigacións propias do seu cargo como membro da Xunta Directiva e poderán recibir por acordo desta o encargo de presidir ou coordinar grupos de traballo así como a execución de encargos,

comisións, representacións e outras tarefas que pola Xunta Directiva lle fosen encomendadas.

Artigo 20º As vacantes que se puideran producir durante o mandato de calquera dos membros da Xunta Directiva serán cubertas provisionalmente entre ditos membros ata a elección definitiva pola Asemblea Xeral.

CAPÍTULO III

Artigo 21º A Asemblea Xeral é o órgano supremo e soberano da Asociación e estará integrada por todas as persoas asociadas.

Artigo 22º As reunións da Asemblea Xeral serán ordinarias e extraordinarias. A ordinaria celebrarase obrigatoriamente unha vez ó ano, dentro dos catro meses seguintes ó peche do exercicio e nela proporase a aprobación das contas e presupostos e o programa xeral da actuación social. Tamén nela se procederá á elección de membros da Xunta Directiva cando corresponda por imperativo estatutario; as extraordinarias celebraranse cando as circunstancias o aconsellen, a xuízo da Presidencia, cando a Xunta Directiva o acorde ou cando o pida ou solicite formalmente por escrito un tercio dos/as asociados/as.

Artigo 23º As convocatorias das Asembleas Xerais realizaranse por escrito expresando o lugar, día e hora da reunión, así como a orde do día con expresión concreta dos asuntos a tratar. Entre a convocatoria e o día sinalado para a celebración da asemblea, en primeira convocatoria, haberán de mediar ó menos 7 días, podendo así mesmo facerse constar a data e hora en que se reunirá a asemblea en segunda convocatoria, sen que entre unha e outra poida mediar un prazo inferior a un cuarto de hora.

Artigo 24º As Asembleas xerais, tanto ordinarias como extraordinarias, quedarán validamente constituídas en primeira convocatoria cando concorran a ela a maioría das persoas asociadas e en segunda convocatoria, calquera que sexa o número de persoas asociadas presentes.

Os acordos tomaranse por maioría simple das persoas presentes ou representadas, cando os votos afirmativos superen ós negativos non sendo computables a estes efectos os votos en branco nin as abstencións.

Artigo 25º Será necesario o voto favorable dos dous tercios dos/as asociados/as presentes na asemblea para adoptar as seguintes decisións:

- a) Disposición e Enaxenación dos Bens.
- b) Solicitude de Declaración de utilidade Pública da Asociación.
- c) Integración en Federacións.

- d) Modificación Estatutaria.
- e) Disolución da Asociación.

CAPÍTULO IV

SOCIOS

Artigo 26º Poderán ser membros da Asociación todas as nais, pais ou titores maiores de idade, dos/as alumnos que cursan estudos na E.E.I. Milladoiro“ , sito na Travesía do Porto sen número, Milladoiro -Ames

Artigo 27º Serán dereitos das persoas asociadas:

- a) Elixir, e ser elixible para tódalas funcións representativas da Asociación.
- b) Ter voz e voto nas reunións da Asociación.
- c) Tomar parte en tódalas actividades da Asociación e utiliza-los servicios que poidan establecerse en beneficio dos socios.
- d) Dirixir peticións e propor iniciativas ós Órganos de Goberno da Asociación.
- e) Acadar e recibir da Xunta Directiva canta información precisen sobre a xestión asociativa,
- f) Asistir a tódalas reunións e actos convocados pola Xunta Directiva.
- g) Colaborar activamente no cumprimento dos fins da Asociación e na execución e eficacia dos mesmos.

Artigo 28º Serán deberes das persoas asociadas:

- a) Observar e cumpri-los estatutos da Asociación e os acordos da Asemblea.
- b) Contribuír economicamente ó sostemento da Asociación na forma e modo en que se estableza na Asemblea Xeral.

Artigo 29º Causara baixa na Asociación:

- a) Por petición do interesado/a.
- b) Por baixa dos/as fillos/as matriculados no Centro.
- c) Por falta de pagamento das cotas mediando un apercibimento previo da Xunta Directiva.

d) Por incumplimento dos Estatutos.

e) Pola utilización da Asociación con fins alleos ós específicos da mesma.

Para excluír a calquera persoa asociada polas causas do apartado d) e e) do anterior artigo, deberá abrirse un expediente pola Xunta Directiva no que se sinalarán detalladamente os feitos que orixinan a expulsión. Así mesmo deberase oír ó/á propio/a expedientado/a que poderá presentar un prego de descargo alegando o que considere conveniente na súa defensa e que se unirá ó expediente que estudiará a Xunta Directiva e propondrá a decisión que considere oportuna. Se optase pola expulsión presentaraa na próxima Asemblea Xeral que despois de oír á Xunta Directiva e á persoa asociada se o solicita, tomará unha decisión que será inapelable.

Artigo 30º Os recursos económicos para o desenvolvemento dos fins e actividades da Asociación serán os seguintes:

a) As cotas dos/as socios/as periódicas ou extraordinarias que serán determinadas pola Asemblea Xeral a proposta da Xunta Directiva.

b) As subvencións, legados, herdanzas ou doazóns que puidera recibir de forma legal e que sexan aceptados tanto que proveñan de persoas físicas ou xurídicas.

c) Calquera outro recurso de procedencia lícita.

Artigo 31º A Asociación carece de patrimonio fundacional. O patrimonio social que se vaia constituíndo estará composto por tódolos bens que se adquiran para a realización dos fins sociais. A súa administración corresponde á Xunta Directiva.

Artigo 32º O exercicio asociativo e económico coincidirá co inicio e finalización do curso escolar que fixe a Administración Educativa para cada ano académico.

CAPÍTULO V

DISOLUCIÓN

Artigo 33º Esta Asociación disolverase voluntariamente cando así o acorden a Asemblea Xeral convocada a tal efecto e por acordo dunha maioría de dous tercios dos/as asociados/as.

Artigo 34º No caso de disolución nomearase unha comisión liquidadora a cal, unha vez extinguidas as débedas e se existise sobranse líquido, se destinará a aquelas entidades sen fin de lucro dedicadas á realización de fins educativos cun espírito similar ó que anima esta asociación e que se sinalará na Asemblea Xeral na que se acorde a liquidación.

DISPOSICIÓN ADICIONAL

En todo cando non esté previsto nos presentes estatutos aplicarase a vixente lei orgánica 1/2002 do 22 de marzo, reguladora do Dereito de Asociación, así como a lei orgánica 8/1985 reguladora do Dereito á Educación do 3 de Xullo de 1985 e demais disposicións específicas da aplicación provenientes da Comunidade Autónoma de Galicia ou do Dereito Estatal Supletorio en ausencia do autonómico segundo dispón a Constitución Española.
